

胡文忠公遺集

胡文忠公遺集卷三十一

長沙鄭敦謹

編輯

湘鄉曾國荃

查明巡撫銜浙江布政司李續賓三河鎮陣亡

實蹟懇

恩加等優卹疏

八年十二月十

一日督發

臣等前因援皖之師在三河挫失變起倉卒傳聞異詞謹將大概情形先行馳奏李續賓素性剛烈固知其必無生理惟念該員功績冠時爲東南數省仰望之人若不查明確切事蹟恐傳聞失實不足以宣

昭忠烈垂示後來茲據李續賓胞弟道員李續宜收
集三河桐城員弁勇丁七千餘人逐一查詢又據舒
城桐城潛山霍山等縣紳民合詞稟稱已於三河戰
場將李續賓忠骨收殮由閒道送至霍山經李續宜
遣員前往驗視屬實臣等查李續賓提兵入皖一月
之內連克四城聲威甚振克舒城之後急欲進剿廬
州城於三河鎮設立偽城一座磚壘九座憑河設險
負固有年該處爲水陸衝途實扼廬州之總要其屯
聚米糧軍火卽以接濟廬州金陵賊營也必先得三
河乃能進兵廬州然合計兵勇一分於九江湖口彭

澤再分於蘄州黃州又分於桐城舒城所帶不過五千人九月二十八日抵紮三河審視形勢以攻城必先破壘遂派義中營運同丁銳義義左營參將張嵩齡義右營都司張養吾護右營參將彭友勝利中營副將李存漢毅中營副將彭祥瑞攻河南大街及老鼠夾一帶之壘派左仁營副將黃勝日凱左營副將楊得武湘後營副將周寬世攻東北面迎水庵水晶庵一帶之壘派副右營總兵李續燾後仁營游擊李運緒攻西面備家越之壘而親督同知直隸州金國琛府經歷縣丞劉運會毛有銘率湘中右營副將劉

人和率親兵營馬隊爲各路策應於十月初二日黎明出隊進攻賊壘該逆以大股迎敵我軍分途並進首斃衝鋒悍賊百餘名該逆稍卻我軍乘勢猛進斬敵益眾賊始敗奔入壘憑牆死拒礮如雨點諸勇奮迅而進縱火焚燒烈燄突起賊眾乃亂我軍乘機奪柵而入一鼓緣登九壘俱下壘中之賊均經殪盡其時城賊與白石山之賊分途救援復爲我馬步隊擊退是日共計斃賊七千餘名而我軍傷亡參將蕭意文都司胡在位以下一千餘人經此血戰痛勦該逆已成孤注旋據探報並搜獲僞書知首逆陳玉成率

大股自江浦六合廬江來拔首逆李世賢捻逆張樂
行自廬郡率大股來援號稱十餘萬連夜竄至三河
三十里之金牛鎮白石山一帶連營數十里包抄大
軍後路因念眾寡懸殊而我軍血戰數月傷損精銳
已多必須添調以厚兵力當卽飛催換防潯軍並調
畱防陳德園之昌營星夜赴潛山接應又抽調防守
桐城之亢中貞右等營赴舒城接應未及到防初九
日援賊逼近勢頗猖獗是夜李續賓派湘中右四哨
交同知金國琛府經毛有銘督帶並派凱左楊得武
護右彭友勝義中丁銳義義左張嵩齡義右張養吾

親兵馬隊劉人和各出六成隊於初十日五鼓前往
金牛鎮擊勦其餘各營畱防城賊我軍行十五里黎
明至樊家渡王家祠堂地方突遇大股來撲金國琛
毛有銘劉人和等馬步分進該逆以數枝包抄以數
枝搦戰湘軍齊進迎環轟擊賊乃大奔追逼賊壘殺
賊約踰二千忽大霧迷漫咫尺莫辨該逆由左路抄
出數大股直前衝突時我軍之在左路者後仁營先
潰義中義左義右等營相繼而走致中右兩路各營
均爲賊抄襲返戈衝殺而前後皆賊參將彭友勝游
擊胡廷槐饒萬福等力戰陣亡其餘員弁勇丁傷亡

過半隊伍星散歸路已爲賊阻截矣李續賓自領親
兵並飛調毅中左仁湘後利申等營接應衝盪數十
次殺賊最多僞城之賊復分股衝出合之援賊絲亘
二三十里環繞來撲游擊鄒玉堂游擊杜廷光守備
趙國幹等力戰陣亡各弁勇傷亡愈眾李續賓一面
奮戰一面傳令軍中嚴守牆壘是時賊已逼近而後
仁營義右營敗後颺去護右凱左及親兵馬隊等營
被賊阻截不能回營義中義左均無守志此七營牆
壘已被賊攻破惟運同丁銳義衝入李續賓營盤期
與統將其命其餘各營惟副右尙是全隊在營其湘

黃名馬選集卷三十一

後中右毅中利中左仁等營僅留四成隊守壘餘皆
隨從李續賓苦戰至二更殺賊已近二千李續
彭祥瑞率勇越壘衝出於是賊踞其壘挖斷河隄以
絕我軍去路李續賓勇氣百倍怒馬當先往來奮擊
斃賊又數百人我勇傷亡亦多戰至三更李續賓身
面均受矛傷力竭陣亡侯選同知曾國華何裕知府
銜湖北候補同知何忠駿湖南候補知縣王揆一候
選縣丞李續藝候選訓導吳立蓉萬斛源等均同時
力戰陣亡隨從員弁退守營牆以俟舒桐兩處援兵
期保全中軍爲李續賓復仇惟該處地勢平行河港

紛歧園田溝澮逶迤相屬我圍賊則賊無所施其技
賊圍我則我軍亦難爲功維時該逆之眾百倍於官
軍四面圍攻礮石如雨更番疊進晝夜不息我軍守
志雖堅無如眾寡大相懸殊是夜四更利右營被賊
攻破而該營帶兵官李存漢猶衝入中右營圍爲李
續賓保全士卒十二夜湘後左仁兩營被賊攻破惟
李續賓自帶之中右營恪守軍令感恩畏法士無去
志又經丁銳義李存漢與湖北卽補道孫守信候選
府經歷縣丞劉運會守備蕭廷玉從九李肇用尹耀
莘等曉以忠義督守孤壘至十三日夜靜鉛礮水木

俱盡援兵隔絕不前勢遂萬不能支矣孫守信丁銳
義劉運會蕭廷玉李肇用等先後力戰死之是夜四
更李存漢督率勇夫向東北僞城殺開血路越濠浮
水奮力衝出得脫免者僅什之二三此李續賓率五
千人進勦三河旬日苦戰破賊九壘前後殺賊萬二
三千人卒因賊眾勇單援兵不至以致捐軀殉節之
實在情形也凡三河先後所潰員弁勇丁惟副將楊
得武徑赴潛山其餘皆併歸桐城當初十日三河喫
重守舒城之信前營副將謝永祐一聞警信遽從小
路繞赴桐城賊遂分兩股一由杭鋪繞舒城一由梅

心驛竄桐城先是李續賓以桐城爲安慶舒城後路
派總兵趙克彰統帶六營及巴圖隆阿保慶馬隊等
營又檄調九江防兵參將趙友材副將沈俊德副將
蕭慶衍併歸趙克彰節制駐守桐城爲後路聲援十
九日賊出數大股來撲漫山遍野約七八萬人趙克
彰令原在桐城各營及謝永祜之信前營均以四成
隊守濠六成隊迎敵自午至酉鏖戰四時彼此均多
傷亡李存漢趙友材候選知縣謝嗣湘府經縣丞李
景均各懷義憤力竭戰歿前仁朱希廣先敗退至長
濠該營牆壘被賊焚燬各營守濠之勇逐漸潰亂趙

克彰卽收隊回營而賊已從後路衝入長濠包裹營盤各營見勢不敵遂於是夜先後衝出重圍李長林彭祥瑞劉人和等被賊追殺其時城中無營護守惟三河之潰卒聚於城內見賊逼近遂與各營同潰歲十月十九日趙克彰桐城潰失之實在情形也臣等查李續賓自咸豐二年賊圍長沙奉其父李益勝之命首倡團練講求束伍選士之法湘勇軍律惟所部獨精其選士以知恥近勇樸誠敢戰爲尙以少擊眾屢建奇功遂以平定湖南湖北江西規復安徽等省大小六百餘戰克復城池四十戰無不勝未曾少挫

臣 胡林翼四年在蒲圻遇塔齊布卽語臣曰李續賓

忠勇沈毅用兵如神異日必爲

國家棟樑其時

方以縣丞升知縣也前在武昌九江統馭一二萬人
號令嚴肅秋毫無犯湖南湖北江西浙江安徽官民
無不爭思倚重其臨陣安閒肅穆厚重強固凡遇事
之難爲而他人所畏怯者無不毅然引爲己任其駐
營處所百姓歡忭耕種不輟萬幕無譁一塵不驚非
其法令之足以禁制諸軍實其明足以察情僞而一
本至誠勇冠三軍屢救弁勇於危難處事接人和平
正直不矜不伐也卽如三河失利之始武昌父老均

至臣輿前詢問李續賓存亡痛哭而去又如一月之內克復四城縱橫掃蕩本無暇施恩澤於百姓而舒桐難民猶復不遠千里負送屍骸李續賓初十血戰捐軀各營亦陸續失陷其本營士卒瘡痍滿目猶能孤壘獨守歷四晝夜而效死不去其得兵民之心若此當撫標義營後仁營接仗失利之時或勸之斂兵退守矣出重圍李續賓則曰軍興九年每以退走損國威長寇志吾當血戰縱橫多殺一賊卽爲地方多除一害遂焚香九叩首取所奉

廷旨

硃

批奏摺焚之曰不可使

宸翰落於賊手帶隊出

營血戰竟日力竭而亡其臨難堅定從容就義如此
臣 胡林翼在本籍聞變寓書湘鄉慰其父母並以其
時尙未得屍骸爲愧恨其父 誥封榮祿大夫李

登勝復書言遣子討賊志在成仁本不望其生還昔
人以馬革裹屍爲壯烈以今視之與身膏原野等耳
其一門忠義志節過人李登勝平日寄書教子勉以
忠良囑無以親老分心李續賓所得藩司養廉均施
於軍中義士於本籍設祠以祀陣亡將士於九江設
祠以祀塔齊布私家田宅不長尺寸臣每過其營讀
其家書亦未嘗不感動流涕也所有巡撫銜浙江布

政使李續賓應請

鴻施逾格照巡撫銜加等追

贈從優議卹並請於湖北江西安徽及本籍湘鄉設立專祠以昭功烈而妥忠魂其父母年逾七十忠厚積累矜式鄉里懇請 天恩逾格獎賞以爲教忠

者勸李續賓之子李光久李光令現均讀書應童試懇請 恩施逾格出自 聖裁 李續賓歷

年戰蹟另列清單恭呈

御覽謹合詞恭摺具

奏

殊批另有旨詳覽奏蹟不覺隕涕惜我良將不克令終尙冀其忠靈不昧他年生申甫以佐予也欽此

巡撫銜浙江布政使李續賓家世出身戰功事蹟
清單

巡撫銜浙江布政使摯勇巴圖魯李續賓籍隸湖
南湘鄉縣曾祖李本桂祖李白詩父李登勝均贈
榮祿大夫世傳忠厚耕讀相承李續賓自幼讀書
端凝沈毅器識過人咸豐二年賊圍長沙羅澤南
倡辦團練李續賓奉父命應之能以兵法約束子
弟明恥教戰訓練尤精三年奉會國藩駱秉章檄
援江西戰勝改赴吉安克復太和安福縣城十二
月克復湖南永興縣城四年肅清湘潭土匪隨會

國藩東征七月克復岳州府城破城外賊壘追至
臨湘縣之長安驛湖北蒲圻之羊樓崗崇陽之虎
爪石桂口大勝克復崇陽咸甯兩縣城戰於橫溝
橋官步橋獲勝追賊至湖北省城破花園賊壘三
座復破入步街鮎魚套等處賊壘克復湖北省城
九月追賊至興國州之鹽埠頭大勝克復興國州
城勦賊至田家鎮戰於半壁山時賊眾百倍弁勇
怯退李續賓手斬二人以徇遂大勝破賊眾十餘
萬渡江追賊至栗木橋雙城驛大勝克復黃梅廣
濟兩縣城追賊至濯港孔隴大勝復渡江攻九江

城攻湖口援賊至梅家洲大小十餘仗五年調戩
江西賊匪克復弋陽縣廣信府城克復興安德興
浮梁三縣城攻剿義甯州之三都梁口碁盤嶺連
戰大勝克復義甯州城奉會國藩檄回援湖北克
復通城縣城進剿桂口太勝克復崇陽縣城搜剿
壕頭堡羊樓崗之賊三戰皆勝克復蒲圻咸甯兩
縣城追至山坡大勝駐軍湖北省城東門洪山復
與羅澤南分兵獨扼密灣斷賊接濟大小七八十
戰均大勝六年三月羅澤南攻城破傷殞命由密
灣帶營回駐洪山統領軍事三月攻破保安門中

和門新壘三座平濠六道毀長虹橋西賊壘長壕
四月攻城賊大勝賊乘我兵分援江西分股劫糧
迎擊之大勝攻保安望山門青山窰灣各處出城
之賊助水師攻漢陽賊艦均大勝五年計誘城賊
出戰大勝復擊敗援賊於後路豹子澗追賊至入
角嶺擊城賊大股於東嶽廟南湖坪小龜山又遏
城賊之竄逸者均大勝六月追賊至武昌縣之葛
店樊口克復武昌縣城渡江會水師攻黃州城均
勝適翼賊石達開由金陵會湖口臨江各路賊黨
共七八萬人上犯分十三股並進授各軍以應敵

之策分勦城賊援賊旬日之內大小二十八仗均
大勝七月破援賊九壘八月破援賊十九壘增勇
開壕遂爲長圍斷賊接濟十月十一月賊屢乘夜
衝突均經擊退十一月二十二日攻克武昌省城
當夜分三路追勦克復武昌縣城會水師克復黃
州府城克復大冶縣興國州蘄州瑞昌縣城十二
月至於九江會水師更番攻城擊敗梅家洲湖口
援賊分兵攻九江城大勝七年正月定計濬長壕
三十餘里二月賊出毀壕迭次殲敗之擊賊於八
里坡西壩復引兵擊伏賊於下八里坡敗湖口援

賊於茶庵敗安慶援賊於新壩三月長濠工竣四月皖賊犯蘄州分兵陸家嘴又分兵援蘄州均大勝五月悍賊出城踰濠擊敗之六月督軍渡江助都興阿戰於童司牌大勝破賊十九壘八月會水師攻破小池口僞城九月定計密約楊載福彭玉麟水陸會攻湖口克梅家洲僞城克彭澤縣城遂拔彭澤小姑狀兩岸僞城及賊壘克復湖口縣城十月分兵會合水師擊退圖援九江之賊於湖口彭澤大勝殲除萬餘人十二月臨江逸賊竄近興國撥兵勦洗淨盡八年二月分三道開挖地道轟

陷九江城兩次四月東南隅地道工竣地雷轟陷
百餘丈克復九江府城萬餘之賊無一脫逃者時
皖逆陳玉成陷麻城黃安移軍進攻五月克麻城
黃安縣城七月遵 旨征皖八月攻破楓香鋪

小池驛賊壘克復太湖並潛山縣城九月攻破桐
城四面賊壘克桐城縣城進攻梅心驛及舒城城
外賊壘破之克復舒城李續賓以書生慕義從戎
所得廉俸悉充軍餉身歿之後家無餘財在軍中
無時不以愛民下士爲念湖北江西士民爭赴營
捐輸助餉歌頌載道並爲德化縣定章除厯年漕

糧浮勒之弊吏胥斂手士民頌德陣亡後湖北湖
南江西安徽士民巷哭如失所依柵舒之人從賊
中密求其屍冒險衛送每出陣則怒馬當先親冒
礮石故士卒莫不奮勇向前以少破眾九江湖口
小池口等處從前官軍力攻閱五年不能下銳志
圖之水陸弁勇中傷已逾數千人而忠毅之氣百
折不回竟以成功奉 旨援廬提軍深入已成

破竹之勢而竟以賊眾兵甲救援不至力竭捐軀
當三河血戰時顧諸僚佐曰我義當死戰以報

國諸人可自圖生也僚佐皆言公義不負 國我

等豈可負公文武員弁同時殉難尤烈蓋其廉潔
公忠寬仁敦大質本天性推誠及人無間遠近云
李續賓從軍七年未嘗省親臣等擬於六月代爲
乞假其父李登勝聞其奉旨撥院作函止之
諭以盡心戎行爲國出力勝於侍養庭幃矣李
續賓感念勛勵之言毅然加奮慷慨赴義跡其七
年之中克復四十餘城大小六百餘戰實軍興以
來功績最盛威名尤著之員理合聲明

上諭官文等奏查明統兵藩司陣亡實蹟懇請優卹一摺
覽奏不覺隕涕巡撫銜浙江布政使李續賓當賊匪圍

撲長沙之時首倡團練屢建奇功嗣後赴援江西調回
湖南旋隨會國藩東下克復武漢凡江西湖北湖南等
省攻克巨壘堅城該藩司無不親歷行閒身先將士通
計七年之閒先後克復四十餘城大小六百餘戰以少
勝眾所向無前一時諸將之中無與倫比本年七月赴
援安徽甫逾匝月連克潛太舒桐朕以其謀勇素優威
望眾著特命幫辦安徽軍務方冀肅清皖北淨掃狂氛
特膺懋賞乃因進圖廬郡先剿三河苦戰旬餘殺賊逾
萬江浦六合廬江逆黨大股來援以五千兵勇當十餘
萬之賊將士傷亡從容赴義其中忠勇義烈之氣雖死猶

生實深悼惜李績賓著加恩追贈總督卽照總督陣亡
例賜卹入祀昭忠祠任內一切處分悉予開復應得卹
典該衙門查例具奏伊父李登勝著賞給光祿大夫封
典並賞銀五百兩由湖南藩庫給發伊子李光久李光
令均著賞給舉人一體會試仍於服闋後交吏部帶領
引見並著於湖北江西安徽及湖南湘鄉本籍各建專
祠以示朕褒卹蓋臣至意欽此

安徽三河桐城舒城太湖等處陣亡文武員弁銜
名事實及陣亡月日地方清單

候選同知曾國華湖南湘鄉縣人咸豐六年三月

聞羅澤南陣亡來鄂撫慰湘勇經臣胡林翼委帶
湘軍並委統領普承堯吳坤修劉騰鴻各軍營務
赴援江西時江西連陷六郡與湖北湖南音問阻
絕勢頗危急該員起程之時復值賊匪由江西竄
入鄂之上游冀以阻遏援軍也遂由咸甯蒲圻羊
樓崗等處沿途迎勦大勝取道萬載克復新昌上
高遂圍瑞州曾國華以書生從戎而所部又多勇
悍難馴之士勉以忠義感以誠信艱難險阻百折
不回竟能使江西道路與湖南湖北一律疏通則
曾國華之力也七年二月與侍郎臣曾國藩定計

繞城開濠斷賊接濟瑞州克復因丁憂辭保八年
六月浙江藩司李績賓調赴湖北奏明附營幫
辦該員孝弟忠信廉隅自守專精史學論議奇特
不爲庸俗之詞講求經世大政忠盡之至本於天
性征院以來克復潛太桐舒四縣十月初十日在
三河圍中與李績賓督勇奮擊力竭陣亡該員歷
年積功應保因丁憂稟辭應請追贈道員照道員
例從優議卹

運同丁銳義湖南長沙縣人家世儒宗一門孝友
咸豐四年臣胡林翼在岳州延訪帶勇收復崇陽

通城通山隨征九江湖口五年勦賊於武昌省城外白沙洲八步街金口紙坊咸甯各處連戰均勝六年攻勦城賊焚燒賊巢於葛店追至華容樊口克復武昌縣進攻黃州回營擊援賊大股隨同克復省城七年勦賊蘄州屢勝大破賊於上巴河八年勦賊於黃泥畝青天畝南陽河界牌石彌陀鎮各處前後平壘七十餘座殺賊數千嗣奉李績賓檄同征皖破石牌賊壘連克太湖潛山桐城舒城等縣破三河鎮賊壘十月初十日在三河出隊受傷督勇奮戰李績賓陣亡與湖北補用道孫守信

等激勵軍士堅守營壘身受重傷猶指揮兵勇竭力禦賊十三夜鉛礮水米俱盡督勇力戰往來衝擊復受傷墮地賊問之大呼曰我義營統領丁銳義也逆賊要殺卽殺多語何爲被羣賊攢刺而亡該員積功待保應請追贈鹽運使銜照鹽運使例從優議卹再丁銳義從征五年所部皆其鄉里陣亡甚多其父兄已爲設立忠義祠字應請以丁銳義在長沙縣本籍入祠而以歷年及本年陣亡弁勇附祀

湖北補用道孫守信湖南長沙縣人由供事以從

卷之三十一

三

九品分發湖北於剿辦湖南逆匪李沅發湖南省城解圍出力署湖北蒲圻縣督辦團練打仗各案歷保同知五年於洪山入湘營總理文案參酌機宜聯絡將士具有膽畧六年剿賊於武昌之葛店樊口圍攻黃州府克復省城甚爲出力嗣隨浙江藩司李續賓追賊克復武昌大冶興國等州縣以至九江合圍攻城七年復隨李續賓渡江戰於廣濟童司牌殺賊數千十二月臨江賊逸至興國州偕副將周寬世督勇剿洗八年隨副將趙克彰剿賊於麻城縣邊界隨大軍征皖連克潛太桐舒等

縣十月初十日李績賓陣亡偕周寬世丁銳義在
三河竭力守壘激兵勇以忠義四日夜無退志子
盡碎鼎釜以代賊使人持書招降怒斬之至十三
夜率眾奮勇出營衝敵眾寡不支諭勇夫云我以
一死報國汝等得歸可記我死所遂揮刃衝賊
力盡而亡應請追贈按察使銜照按察使例從優
議卹

知府銜湖北卽補同知直隸州何忠駿湖南平江
縣舉人咸豐三年在籍辦理團練屢次督勇擊退
隨臣胡林翼克復通城縣隨前提督塔齊布攻崇

陽沙坪賊復犯平江六戰均勝隨江忠淑克通城
方賊之再陷義甯通城崇陽巴陵臨湘四路侵軼
惟平江一縣力戰卻之始終四年賊不入境則何
忠駿團練之功也隨臣胡林翼克崇陽縣前後三
十餘戰兼籌餉三萬餘緡五年賊復陷通城連戰
獲勝隨羅澤南克復通城經臣胡林翼調赴大營
辦理軍務隨同李續賓克復黃安太湖潛山桐城
舒城五城該員身履戎行不避艱險兼理文案才
識過人十月初十日在三河被賊圍逼與李續賓
督勇力戰同時陣亡請照知府例從優議卹

前署湖南道州事卽用知縣王揆一河南新鄉縣
進士署道州時廉仁愛民自以失守嬰罪日懷愧
憤籌辦軍糈不辭勞瘁四年隨同臣胡林翼收復
常德澧州駐防岳州收復崇陽通城五年隨臣胡
林翼防勦沌口金口七年經臣官文奏請隨營
效力贖罪派往黃州一帶防勦備嘗艱險調赴九
江襄理軍務隨勦湖口彭澤策馬行閒親冒矢石
連戰大勝八年四月轟陷九江府城參謀盡力克
復黃安潛太桐舒等縣十月初十日出壘衝擊力
竭陣亡應請追贈同知照同知例從優議卹

候選同知何裕江蘇宜興縣監生績學敦品居家
孝友咸豐六年在江蘇省城帶勇協擊潮匪出力
七年克復江蘇瓜洲鎮江團練出力八年臣胡林
翼調赴湖北湘營差遣十月初十日在三河力戰
陣亡應請照知府例從優議卹

監生何保三江蘇宜興縣人十月初十日隨父同
知何裕在三河陣亡應請照從九銜從優議卹

以上七員名均於十月初十三等日在三河
陣亡

候選同知直隸州董容方知縣楊德閻府經歷縣

丞劉運會李續藝從九李肇用李宗烈俞金波尹
耀莘八員均隨營多年總理文案支應軍火糧餉
不辭勞瘁劉運會李續藝並督隊攻戰摧堅陷陣
十月初十日在三河同時戰歿董容方楊德閻因
營官周寬世楊得武出戰未歸鼓勵軍士堅守營
壘力竭陣亡董容方擬請照知府從優議卹楊德
閻擬請照同知從優議卹劉運會李續藝擬請照
知縣從優議卹李肇用李宗烈俞金波尹耀莘擬
請照縣丞從優議卹再董容方劉運會李續藝李
肇用李宗烈俱湘鄉縣人楊德閻長沙縣人俞金

波安徽銅陵縣人尹耀萃湖北江夏縣人合併陳明

候選訓導萬斛源湖北興國州人訓導吳立蓉文童鍾國彥湖南湘鄉縣人績學勵行鄉里所重在營辦事守正不阿忠勤奮發十月初十日在三河捐軀盡節萬斛源吳立蓉請照知縣從優議卹鍾國彥請照縣丞例議卹

候選知縣謝嗣湘湖南湘鄉縣人訓導許恆恆湖南益陽縣人均入營多年操守清廉辦事勤慎不避艱危當十九日桐城各營戰敗後猶固守營壘指

揮勇夫禦賊力竭陣亡謝嗣湘請照同知從優議卹
卹許恆請照知縣從優議卹

候選主簿李鏡源湖北江夏縣人

候選從九蕭克修湖南湘鄉縣人

以上二員均於十月初十日在三河陣亡均擬

請從優照縣丞例議卹

廩生雷初申湖南長沙縣人

文生何向瀛湖南道州人

監生張溥萬湖南長沙人

文童周文宣章兆鶚湖南湘鄉縣人

文童許恬源湖南道州人

文童張庚湖南湘潭縣人

文童張家元易邛隆湖南長沙縣人

文童陳良臣湖北漢陽縣人

文童桂邦熾鄭德匯湖北江夏縣人

以上十二名均於十月初十三等日在三河

陣亡均擬請從優照從九例議卹

副將銜參將彭志德湖南湘鄉縣人於十月十三日在三河陣亡請照副將例從優議卹

參將彭友勝湖南長沙縣人

參將蕭意文周福高湖南湘鄉縣人

以上三員均於十月初二初十等日在三河陣
亡均擬請從優照副將例議卹

參將銜游擊朱恢三湖南長沙縣人於十月初十
日在三河陣亡擬請照參將例從優議卹

游擊杜廷光鄒玉堂胡廷槐王槐興劉聚勝劉祥
發俱湖南湘鄉縣人

游擊饒萬福湖南湘陰縣人

以上七員均於十月初十三等日在三河陣
亡均擬請從優照參將議卹

游擊銜都司王繼龍湖南湘鄉縣人

游擊銜都司會澍霖湖南長沙縣人

以上二員均擬請照游擊例從優議卹

游擊劉和益湖南湘鄉縣人

游擊銜都司彭洪勝湖南善化縣人

以上二員擬請照游擊例議卹

都司夏全勝湖南甯鄉縣人

都司葉九疇龍應自謝光秀李昇三馬超文俱湖

南湘鄉縣人

都司黃朝賢湖南瀏陽縣人

都司劉泗清湖南湘潭縣人

都司胡在位湖北蒲圻縣人

都司顧必成湖南平江縣人

以上十員均於十月初二初十十三等日在三

河陣亡均請從優照游擊例議卹

都司楊顯貴湖南湘鄉縣人

都司朱神彩湖南湘鄉縣人

都司姚祖益湖南湘鄉縣人

以上三員均請照都司例議卹

都司銜守備王啟興湖南鎮寧人

都司銜守備羅澤鏡湖南湘鄉縣人

以上二員均請照都司例從優議卹

湖南撫標守備蕭廷玉湖南長沙縣人

守備李前規左國光鄧廷簡胡學端黃順發劉坎
二朱雲貴劉祥勝謝榮堂顏得祿彭祥泗朱樂美
龍應松劉仁光彭祥勝凌步雲俱湖南湘鄉縣人

守備趙國幹湖南湘潭縣人

守備陳得全湖南湘陰縣人

守備袁清華湖南長沙縣人

守備歐寶堂周光曙俱湖南甯鄉縣人

守備李長升湖南瀏陽縣人

守備彭勝椿湖南保靖人

守備李崑崙湖南長沙縣人

以上二十五員均於十月初十三等在

河陣亡均請從優照都司例議卹

守備銜千總蕭長青彭輔魁均湖南湘鄉縣人

守備銜千總覃楚柏湖南長沙縣人

以上三員均於十月初十日在三河陣亡均請

照守備例從優議卹

千總周有堂等三十四名係湖南湘鄉等縣人於

十月初二初十十三等日在三河陣亡請照千總
例議卹

把總王瑞堂等四十八名係湖南湘鄉等縣江西
鄱陽湖北漢陽等縣人均於十月初二初十十三
等日在三河陣亡請從優照千總例議卹把總李
升發湖南湘鄉縣人於十月初十日在三河陣亡
擬請照把總例議卹

外委左茂賓等六十四名係湖南湘鄉等縣湖北
江夏等縣人均於十月初二初十十三等日在三
河陣亡均請從優照把總例議卹

六品藍翎瞿斯漠等十三名係湖南湘陰等縣湖北江夏等縣江西德化等縣人均於十月初十日在三河陣亡請照外委例議卹

副將李存漢湖南湘鄉縣人於十月十九日在桐城縣陣亡擬請從優照總兵例議卹

副將雷風雲湖南湘陰縣人

副將李集賢湖南湘鄉縣人

以上二員均於十月十九日在桐城縣陣亡擬請照副將例議卹

參將趙友材湖南湘鄉縣人於十月十九日在桐

城縣陣亡擬請從優照副將例議卹

游擊賴由海湖南湘鄉縣人於十月十九日在桐城縣陣亡擬請從優照參將例議卹

游擊蕭倬雲湖南湘鄉縣人

游擊彭協和湖南湘陰縣人

游擊周魁亮湖南善化縣人

以上三員均於十月十九日在桐城縣陣亡均擬請照游擊例議卹

游擊銜都司婁國見湖南武陵縣人於十月十九日在桐城縣陣亡擬請照都司例從優議卹

都司楊正春湖南甯鄉縣人於十月十九日在桐城縣陣亡擬請從優照遊擊例議卹

都司賓世興湖南湘潭縣人於十月十九日在桐城縣陣亡擬請照都司例議卹

都司銜守備沈榮發李爲勝湖南湘鄉縣人

以上二員均於十月十九日在桐城縣陣亡均擬請照守備例從優議卹

守備彭稱陶湖南邵陽縣人

守備董怡習湖南湘潭縣人

守備蕭復勝曾正魁何華益胡來孚均湖南湘鄉

縣人

守備劉區山湖南衡山縣人

守備邱光明江西萍鄉縣人

以上八員均於十月十九日在桐城縣陣亡均

擬請照守備例議卹

守備銜千總孔江海陽世維均湖南湘鄉縣人

以上二員均於十月十九日在桐城縣陣亡均

擬請照千總例從優議卹

千總王清和等十五名係湖南長沙等縣江西萍鄉等縣人均於十月十九日在桐城縣陣亡請照

千總例議卹

把總毛慶元等十八名係湖南湘鄉等縣人均於十月十九日在桐城縣陣亡請照把總例議卹

外委余其龍等二十一名係湖南長沙等縣人均於十月十九日在桐城縣陣亡請照外委例議卹
候選訓導朱瞻雲湖南湘鄉縣人

候選府經歷縣丞李錦均湖南湘鄉縣人

湖北候補縣丞毛濟美湖南湘鄉縣人

以上三員均於十月十九日在桐城縣陣亡均擬請從優照知縣例議卹

候選從九周郁文湖北武昌縣人

候選從九趙璜湖南湘鄉縣人

候選從九李復敦湖南湘鄉縣人

以上三員均於十月十九日在柘城縣陣亡均

擬請從優照縣丞例議卹

從九品銜沈寰清湖南湘鄉縣人

文生朱鏡明湖南道州人

文童周錫堂湖南善化縣人

文童李安澍湖南瀏陽縣人

文童謝才英毛際復毛有銀許功炳胡光華熊明

亮李榮春均湖南湘鄉縣人

以上十一名均於十月十九日在桐城縣陣亡
均擬請照從九例議卹

都司銜守備陳文週湖南湘陰縣人於九月十八日在舒城縣陣亡擬請照都司例從優議卹

都司劉紹玉湖南甯遠縣人於八月十六日在太湖縣受傷九月初六日因傷身亡擬請從優照游擊例議卹

守備銜千總喻融亭湖南甯鄉縣人於十月十九日在桐城縣陣亡請照千總例議卹

五品頂戴沈東曉湖南湘鄉縣人於十月十九日
在桐城縣陣亡請照例議卹

謹案此案於十二月二十五日接奉

旨準

再臣等深思軍旅之要賞罰爲先存賞無罰人有偷
心卽吳孫不能自治其軍安望其殺敵致果哉卽使
從前勇敢可稱戰功昭著一肯固不可以掩人大綱
終不可以不立軍政不明勇者亦怯恆情大抵然矣
查此次三河桐城饋事各員花翎宜昌鎮總兵圖薩
泰巴圖魯李副將彭駐營之地系全軍去

路一見勢危先棄營壘花翎記名總兵李勇巴圖魯

趙督勇四千駐守桐城不能督兵以援三河又

不能固守桐城花翎副將振勇巴圖魯謝防守

舒城不戰自退花翎游擊李花翎副將勁勇巴

圖魯朱不能力戰先行失壘花翎都司張

花翎參將張首先敗挫總兵銜協勇巴圖魯楊

○敗後徑走潛山久不歸伍均應請旨革職

李問並將李趙朱楊謝勇

號一併銷去由臣委員提省審明失事確情嚴行分

別懲辦除彭業已斃命應請毋庸給卹外其餘

罪狀稍輕人員暫準立功自贖以覈軍政而飭戎行
理合附片陳 奏

謹按此片於十二月二十五日接奉

旨準



胡文忠公遺集卷三十二

長沙鄭敦謹

湘鄉曾國荃

編輯

勘明各州縣淹旱情形分別緩徵疏

八年十一月十八日

竊照湖北錢糧積習相沿經臣等上年特定章程責成該管道府親詣確勘不準稍有捏飾自經整頓本年各州縣稟報被淹受旱情形不致如前欺飾任意顛倒其有未盡核實者仍卽往返駁查立時更正濱江各屬並鍾隄濱口未修咸豐八年夏秋水漲低窪

田地多被漫淹高阜處所亦閒受旱據各該州縣先後稟報均飭道府週歷履勘加結詳報去後茲據該管道府稟報實勘得嘉魚縣廣賢等八里內三十六甲上洲等九洲內越塘等二十八處上屯等九屯內斗塘等二十三處江水帶淹旋經補種情形較輕漢陽縣菱角湖等八區夏秋水漲淹沒雖卽涸復補種已遲情形次重漢川縣喝城等三十三垸畝因上游獅子口潰口未築水勢下注頻年淹沒並無徵穫情形較重南湖等十五垸畝亦被帶淹收成歉薄情形較輕黃陂縣鐵鑪涇等五社江水漲淹秋收失望情

形次重大嘴等二百二十三社閒有帶淹收成歉薄
情形較輕沔陽州梅公等四十八垸積淹之區本年
復被漫淹秋收失望情形較重張許耳等三十垸淹
後涸出畧資補種情形較輕孝感縣尚義等二百二
社閒有帶淹情形較輕鍾祥縣隄內外龍山觀等五
十八村莊因隄工潰口已成積淹同何家廟等十六
村莊內有下六十七甲亦被漫淹情形均屬次重隄
內湖鄉徐祠堂小高廟等三十八村莊隄外河鄉楊
林等四十八村莊同何家廟等十六村莊內有上二
十三甲均係淹後補種收成歉薄情形較輕天門縣

關廟蒲湖等八十七垸濱臨河岸鍾隄潰口已成積
淹同諸通等四十七垸內有二百一十甲長湖等五
垸內有三十六甲被淹無收情形較重戴嘴等二十
三垸同諸通等四十七垸內有三十七甲長湖等五
垸內有十六甲亦被帶淹間有補種情形較輕京山
縣高集等二十九團地勢低窪鍾隄潰口淹積未消
情形次重潛江縣文慈等七十八垸原係積淤本年
水勢稍減閒資補種情形較輕應城縣葉嘴等三團
因鍾隄潰口水勢建飯而下不能疏通補種情形次
重江陵縣老長等二十九垸從前隄潰後水衝沙壓

本年復被漫淹情形較重張家場等九十二垸所淹較老長等二十九垸畧減情形次重公安縣毛二等三垸並毛一西一等十四垸內共六十甲四節工潰日未修積水灌注情形較重又毛一等垸內四十六甲亦係被淹補種情形較輕石首縣民旺等十六垸同一都等十四坊垸內三十一甲逼近馬林工潰日漫淹無收情形較重監利縣湖南等五十一垸又頻年積淹之崇林等三十七垸地勢極低湖河水灌垸尙漬注田地荒蕪情形較重松滋縣下五等九都八所漬水後沙壓無收情形較重上五等三都開有補

種情形較輕枝江縣青夾等七洲福興等三垸淹後
疏消情形較輕荊門州東一青一各圖內魯家店殷
家河等二十八區坊廂望一等圖區夏秋缺雨收成
歉薄情形較輕以上嘉魚漢陽漢川黃陂孝感沔陽
鍾祥天門京山潛江應城江陵公安石首監利松滋
枝江等州縣被水積淹帶淹荊門州受旱歉收均係
實在情形再四駁查委無捏飾並屯坐各衛軍田情
形亦屬相同各該業民或補種雜糧或捕魚爲業藉
贖生計勘不成災所有應徵咸豐八年銀米隄閘河
費開丁租餉蘆課並應行帶徵等款請分別緩徵遞

緩以紓民力由藩司羅遵殿署糧道張暉孫分別會
詳請 奏前來 臣 等伏查州縣遇有水旱災傷例應
勘明分數分別撫賑蠲緩如不成災亦請緩徵遞展
本年湖北各州縣被淹受旱田地據該管道府勘明
均不成災然皆耕種失時收成歉薄若將新舊錢糧
銀米責令照常完納民力實有未逮除請緩漕糧另
摺請 旨外合無仰懇 天恩俯準將被淹較

重之漢川縣喝城等三十三垸
岷沔陽州梅公等四
十八垸
天門縣關廟蒲湖等八十七垸
同諸通等四
十七垸內之二百一十甲
長湖等五垸內之三十六

甲江陵縣老長等二十九垸公安縣毛二等三里並
毛一西一等十四里內其六十甲石首縣民旺等十
六垸並一都等十四坊垸內三十一甲監利縣湖南
等五十一垸又頻年漬淹之崇林等三十七垸松滋
縣下五等九都八所各應徵八年新賦錢糧南米隄
開河費閒丁租餉蘆課屯餉等項請一併緩至九年
秋後限一年帶徵內有原緩六七兩年銀米等項展
至十年秋後遞年帶徵又被淹次重之漢陽縣菱角
湖等八區黃陂縣鐵鑼涇等五社鍾祥縣龍山觀等
五十八村莊同何家廟等十六村莊內之下六十七

甲京山縣高集等二十九團應城縣葉嘴等三團江陵縣張家場等九十二垸除各應徵八年南米照常徵收外請將八年新賦錢糧隄閘河費屯餉等項一併緩至九年秋後限一年帶徵內有原緩六七兩年銀米等項展至十年秋後遞年帶徵又被淹較輕之嘉魚縣廣賢等里賢各洲屯漢川縣南湖等十五垸畷黃陂縣大嘴等二百二十三社沔陽州張許耳等三十垸孝感縣尙義等二百二社鍾祥縣徐祠堂小高廟等三十八村莊楊林等四十八村莊何家廟等十六村莊內之上二十三甲天門縣戴嘴等二十三

堦同諸通等四十七堦內之三十七甲長湖等五堦
內之十六甲潛江縣文慈等七十八堦公安縣毛一
等里內四十六甲松滋縣上五等三都枝江縣青夾
等七洲福興等三堦荊門州受旱較輕之東一青一
各圖內魯家店殷家河等二十八區並坊廂望一等
圖各區除各應徵八年錢糧南米隄費等項照常徵
收外如有原緩六七等年銀米隄費等項請遞緩一
年秋後帶徵其有五年以前原請遞緩帶徵之項仍
照 奏案歸於善後案內分別查辦至武昌等衛軍
田應徵應緩銀兩均請查照屯坐州縣一律辦理除

飭取各屬應緩皖區地名銀米數目細冊咨部備查
外理合恭摺具 奏

謹案此疏於十二月二十六日接奉

旨準

勘明各州縣被淹較重懇請緩徵疏 十二月十

八日

竊查前準部咨嗣後蠲緩漕糧於地丁摺外另行具
摺候 旨遵辦等因湖北省濱江各屬咸豐八年
夏秋被淹受旱歉收各州縣現經 臣等將錢糧南米
等項勘明輕重情形另摺 奏請緩徵外惟沔陽天

門江陵公安石首監利等州縣尙有應徵漕糧力難
輸納_臣等於各屬稟報之初卽經駁飭責成該管道
府親履勘務須目擊情形方準加結轉報茲據藩
司羅遵殿署糧道張曜孫會詳請緩前來_臣等覆加
查核參以訪聞委無捏飾合無仰懇 天恩俯準

將被淹較重之沔陽州梅公等四十八垸天門縣關
廟蒲湖等八十七垸同諸通等四十七垸內之二百
一十甲長湖等五垸內之三十一甲江陵縣老長等
二十九垸公安縣毛二等三里並毛一西一等十四
里內共六十甲石首縣民旺等十六垸並一都等十

四坊垸內三十一甲監利縣湖南等五十一垸並頻年漬淹之崇林等三十七垸各應徵咸豐八年新賦漕糧請緩至九年秋後限一年帶徵內有原緩六七年兩年漕糧展至十年秋後遞年帶徵以廣皇仁而紓民力除飭取各州縣應緩垸區里甲米數細冊咨部備查外理合恭摺具奏

謹案此疏於十二月二十五日接奉

旨準

選練提標營兵並酌撥礮船分防襄樊疏 十二

月二十三日督發

稱惟襄樊爲中原重鎮南北衝衢最關緊要思患預防屢經諄屬該地方文武認真巡防實力整頓地方尙稱靜謐惟前派駐防之副訓營唐協和等馬步兵勇因聞三河桐城之警調赴麻城一帶扼紮堵禦雖係移緩就急之計而豫省擒匪出沒無常保無乘機窺伺若不設法佈置壯茲聲威殊不足以資鎮撫然此時下游防剿喫重唐協和等之軍旣難遽撤回襄別軍亦未便分撥前經臣商令署提臣顏朝斌在於提屬各營內挑選精兵一千名兼習馬隊逐日講求訓練使之技藝純熟且令練心練膽咸成勁旅現已

派令參將穆克登布統帶駐紮樊城藉資保衛並酌
給日食犒賞以示體恤仍俟此起兵丁操習純熟再
於各營內更番調替輪流教演庶養一兵卽得一兵
之用以備干城之選卽張雄鎮之威兼可撤勇以節
糜費爲久長之計至襄河餘亘數百里道徑紛歧必
須水師礮船相輔而行臣已派水師健捷副營縣丞
周有全管帶防江礮船十四隻駛赴襄河會合陸師
聯絡聲勢分段巡防以期周密務使奸宄斂跡水陸
要隘悉臻安堵仰副 聖主綏靖地方之至意所
有襄樊地方佈置操練巡防緣由謹會同署撫 臣胡

林翼署提臣顏朝斌繕摺具奏

恭謝 御賜福字各物疏 九年正月二十日

咸豐八年十二月三十日由督臣官文分給 恩

賞 御書福字一方大荷包一對小荷包二對銀

鏤四箇銀錢二箇食物半分到臣與都興阿正商

防勦機宜行次廣濟當卽恭設香案望闕叩頭祇

領欽惟我 皇上延禧四寓 錫福庶民

行疇範於熙春煥 義文於首歲佩垂佩委無遺

頤育之慈同澤同袍咸感 解推之德自

天錫祉匝地凝庥警效力戎行載承 布凱屬

橐鞬而將事時懼弗勝調禱餉以饋軍常虞未給茲
蒙 恩賚彌切悚惶所願 一人有慶銷東南
疹厲之氛萬寶告豐進左右便蕃之祝所有 鑿感激
下忱理合敬謹繕摺叩謝

陳報各省協餉及本省錢漕釐課捐輸等項收
數疏 九年正月二十日

竊 臣 自咸豐五年自江西率師援鄂所有南路收支
兵餉等項經 臣 奏明以咸豐五年正月起到至六年

十二月三十日止爲初案報銷七年正月起到至八年
五月三十日止爲續案報銷當飭司道設局總辦遵

委能於銷算之員調齊各糧臺收支案據逐款清釐
惟查南路軍需臣自江援鄂維時糧臺分設數處一

切款目輻輳紛繁勾稽匪易茲據總辦司道布政使
羅遵殿候補道厲雲官候選道恩祥將咸豐五年正
月起至六年十二月三十日止南路軍需先後共收
過各省協餉及本省錢糧漕折鹽課公費牙釐捐輸
等項銀一百八十七萬三千九百十四兩四錢一分
三釐米一萬八千二百八十六石八斗三升二合三
勺造冊請臣奏前來臣查軍需之銷算以收數爲大
綱該司道等所報收過鄰省協餉及本省錢糧漕折

鹽課公費牙釐捐輸米石數目均屬相符除將清冊咨部查核並飭司道督飭局員將支用各款逐細勾稽次第造冊報銷外謹將南路初案報銷截清銀米收數緣由恭摺具 奏

指員請調來營疏 正月二十八日

竊查軍營首在選將而隨營差委均須才識明練操守廉正之員方資整飭至軍需各局歲籌徵餉數百萬委用得人餉糈不匱遴選失當利歸中飽湖北軍興數年繼復援江援皖水陸各軍事務殷繁自三河桐城失利不獨將領傷亡甚眾卽隨營文武員弁亦

多殉難現在鄰氛緊逼差委不敷須於地方州縣中
選調膽識兼優者入營辦事而吏事餉事又恐經理
失宜再四思議殊深焦灼臣惟軍旅之寄當以訪求
賢才爲始基而財用之源尤以修明政事爲本計茲
查有翰林院編修林汝舟福建侯官縣人品行純謹
才堪經世翰林院編修衛榮光河南新鄉縣人志節
可稱迥殊流俗翰林院檢討童毓四川新津縣人品
學俱優通達時務員外郎銜候補主事林聰彝福建
侯官縣人綜理精密志行清嚴戶部主事閻敬銘陝
西朝邑縣人秉性剛明才識練達選授江西奉新縣

知縣張建基順天永清縣人前在湖北歷任東湖等縣卓著循聲士民思慕至今不替風聞該員尚在直隸本籍以上各員才具人品各有所長惟林汝舟有一面之交餘與_臣等均未識面亦不能確知其在京在籍住所惟訪其所學所志不同時俗居官居鄉均有聲譽合無仰懇

天恩飭下吏部戶部直隸四

川福建河南督撫

_臣

分別飭令林汝舟衛榮光童域

林聰彝閻敬銘張建基六員迅速來鄂聽候差委實於軍務地方均有裨益所有湖北軍營需員請調緣由謹會同督_臣官文恭摺具奏

上諭胡林翼奏請調京外各員隨營差委一摺 翰林院編修林汝舟衛榮光檢討童棫著吏部查明該員等如在京供職卽奏請豫備召見如業經回籍著各該原籍督撫給咨來京伺候召見員外郎銜候補主事林聰彝戶部主事閻敬銘選授江西奉新縣知縣張建基均著發往湖北交官文胡林翼差遣委用該部知道欽此

上諭翰林院編修衛榮光著發往湖北交官文胡林翼差遣委用欽此

遵 旨覆奏行軍進止機宜疏 二月十一日

咸豐八年十二月十六日奉 上諭本日據都興

阿奏移營進規太湖分路布置情形一摺復據奏稱
現患腿疾請賞假調理已降旨賞假一箇月矣蓮花
塘楓香驛餘賊退至太湖等處分茅嶺之賊退至石
牌增壘抗拒另股復由潛山趨大堂五河皆可上犯
英霍該將軍現派各軍責成記名副都統多隆阿統
帶移營前進並由官文檄調九江防兵移紮黃梅飭
令李續宜添調四營前往下游兵力已不爲單薄惟
都興阿告假在營調理雖有多隆阿爲前敵而後路
尙無大員總統調度胡林翼到省後已馳往黃州著
卽申明紀律調度各軍仍以多隆阿爲前敵督飭李

續宜等體察情形節節進勦胡林翼應否督兵前進
著與官文會商辦理倘因兵力不敷卽著官文酌量
調派爲進兵圖皖之計不致遲誤事機是爲至要將
此由六百里各諭令知之欽此咸豐九年正月三十
日奉

上諭據都興阿奏患病未能速痊懇請續
假離營調理已降旨賞假兩箇月矣該將軍現派勦
匪事務正當喫緊據奏有記名副都統多隆阿爲前
敵布置尙無貽誤已將所帶兵勇悉交統帶性軍務
重大總須調度有人胡林翼近在黃州卽著將進止
機宜妥爲籌畫責成多隆阿督率將士各加奮勇不

至因主將遠離遷延觀望並著官文與該撫會商安
辦務臻周密是爲至要將此由五百里各諭令知之
欽此竊臣於上年十二月馳抵黃州將傷敗各營粗
爲整理卽馳入將軍都興阿營中看視病狀商酌軍
情都興阿勞瘁致疾兼受寒溼近用湯葯薰洗甫見
功效春氣融和當可漸次痊愈臣於正月初旬復將
黃州各營大加簡汰擇其精實者調赴太湖統計多
隆阿自統馬步五千餘人并鮑超蔣凝學唐訓方等
營通計已逾二萬均歸將軍都興阿調遣下游兵力
不爲單薄黃州現在各營六千人瘡痍之餘從新整

飭據英山羅田麻城等縣稟報賊匪數萬人分股竄入霍山六安繞出黃州之北面窺伺上游臣於二月十二日移營上巴河以期隨機防剿似不宜歸併下游致使兵勢偏重一隅倘賊匪竟由六安直犯麻城黃安則距太湖大營五六百里而距黃州僅百餘里兼恐賊勢上趨德安漢陽各府縣羣然震動黃州現兵六千人獨當一路尙堪抵禦如或分股竄擾屆期審實情形必須咨商督臣官文將軍臣都興阿於太湖各軍抽撥上援一俟上游無虞邊防穩固再遣將抽兵分途進剿此現在籌商各路之軍情也軍興九

年每苦於逼城而壘一意攻堅士卒摧殘壯志暗銷
而主將不覺及至援賊大至另股乘虛旁擾必致貽
誤事機是官軍注重於前而賊計必轉襲其後官軍
每以仰攻挫銳賊計轉以餘力乘虛卽如七年官軍
併力規徇松賊從蘄州張家塆乘閒竄入八年官軍
併力規太湖於張家塆復設重兵賊又從霍山商城
以陷麻城黃安各縣備一路而虛一路輒多顧彼失
此之虞往事已然前車可鑒現在太湖石簾之賊閉
匿城中堅不出戰賊之狡計固欲以堅城挫傷士卒
而轉於空虛不備之處乘閒抵隙狡焉思逞也獸察

情形賊已憑城設守必非近月所能奏功征皖必圖
三路分進急切求才亦非近月所能酌定昨得都興
阿來函足疾稍痊暫不離營則前敵調度有人尙不
慮其遷延觀望也臣查黃州一郡形如圖甌其東南
爲黃梅與太湖宿松接壤其東爲蘄州蘄水又東北
爲羅田其北則麻城黃安皆與六安霍山潛山英山
商城固始接壤地勢散漫防不勝防是皖楚之要應
以黃州爲適中策應則上下皆宜控制亦東西均便
安慶廬州六安未復則黃州宜設重防不僅目前情
形當以黃州爲根本也臣若督兵前進轉恐援皖之

師腹背受敵致使道路中梗餉糈缺乏實於下游軍情大有關礙且黃州一府財賦繁重甲於通省七年八年官軍血戰經營甫經底定得之甚難棄之可惜自以得尺則尺得寸則寸養賢致民慎固不失爲要務蓋必保楚然後能謀皖此又地勢兵勢之確切情形也惟鄂之謀皖已歷二年總未得勢則以兵只一路也八年秋閒分兵兩路已見功效然尙以賊眾兵單前功盡棄今則統將又弱一个兵力復不如前率意輕進後患滋甚臣愚以爲皖之地勢賊情非分兵爲三路進剿必難成功而鄂省現在防勦江皖水陸

馬步已五萬餘人加以協濟侍郎曾國藩水師彭玉麟各營餉糈通計每月需銀三十六萬兩每月自籌二十餘萬兩仍月欠十餘萬兩添兵則苦於餉糈之竭分兵又苦於統將之少湘中將才如江忠源羅澤南李續賓王鑫等連年彫謝急宜訪求造就以圖繼起有人賢才輩出蓋地方得人則財用之原可開將領得人則兵少而可戰卽六七千人亦可獨當一路而財用之流自節征皖之師必須統將中智畧過人者分爲三路期以一二年委任而責以成功容臣次第訪求專意延攬再行陳奏至鄂居皖省上游鄂軍

得勢則地利人和較之他省情形迥異是討賊之責
鄂省實無可推諉容臣與督臣專意籌商分別奏摺
所有遵旨覆奏緣由理合恭摺由驛五百里馳
奏

硃批所奏甚合機宜欽此

請仍以原擬之員補直隸州知州知縣各缺疏
三月十九日督發

竊查湖北荆門直隸州一缺臣官文於兼署撫臣任
內奏請以儘先補用同知直隸州林之華補授竹
谿縣一缺請以候補知縣汪銘補授旋準部咨以林

之華有經徵南糧欠完革職奉

旨著該督撫出

具考語送部引見再降諭旨之案尙未開復議駁汪銘前在鍾祥縣典史任內丁憂後並無服滿文結到部議駁等因查林之華經徵南糧已於參後續完經臣官文於咸豐八年八月內題請開復汪銘起復

文結於八年十二月報部因到部在後是以請補之案奉駁查荆門直隸州要缺咸豐三年九月本任李棟陣亡懸缺已越五年竹谿縣缺自咸豐二年本任賀綬改歸按經歷懸缺已歷六年前以林之華汪銘分別請補人地實在相宜已將與例不符緣由據實

聲明在案茲查該員等開復之案及起復文結均已到部據藩臬兩司具詳前來臣等復查林之華一員歷任通城武昌潛江等縣於八年正月經臣等保薦欽奉 上諭候補知縣林之華守潔才優官聲卓

越著以同知直隸州仍畱湖北儘先補用欽此汪銘一員以團練出力歷保知縣現署光化縣官聲清廉士民愛戴合無仰懇 天恩逾格俯準將荆門直

隸州一缺仍照原奏以儘先補用同知直隸州林之華請補竹谿縣一缺以候補知縣汪銘請補實於地方有裨所有直隸州知州知縣各缺仍以原擬之員

請補緣由謹合詞恭摺具奏

硃批吏部議奏欽此

指員請補同知知縣各缺疏 三月十九日督發

竊臣等前以鄂省軍務日久員缺久懸同知州縣各缺兩次通融揀員奏補並以各官輪補班次無案可稽聲明請以此次作爲第一次開補嗣後按班輪轉各在案自應分班照例辦理惟查鄂省軍興以來州縣被擾十居六七上年克復黃安麻城肅清未久現在鄰氛四警腹背堪虞籌防籌剿以及撫綏整頓善後事宜亟期得人而治每一缺出或無合例之員

或合例而人地又不相宜拘泥遷就必滋貽誤誠以州縣爲親民之官人之賢否動輿國計民生相爲關係若待補缺之後察看去留無論貪劣之員地方已受其害卽才不勝任廢弛貽誤弊亦不可勝言近年以來迭次劾參不下數十員而吏治尙未盡美是整飭於補缺之後莫若慎重於未補之先似應因地擇人查其員缺實在相宜者揀員請補未便急切循例之實，在情形也查現行新例道府同知通判等官先用分缺先人員分缺先無人則以候補委用捐納輪補茲有施南府同知一缺原任朱澇咸豐八年六

月二十八日病故係簡缺例用分缺先人員現在分
缺先無大應用候補查有候補同知趙篤慶現年三
十八歲湖南武陵縣人出附監生遵捐輸事例報捐
布政司經歷赴部驗看咸豐二年七月二十二日到
省五年克復德安府城案內奉 上諭免補本班

以知州用賞戴藍翎欽此六年克復武昌漢陽案內
奉 上諭免補本班以同知遇缺卽補賞換花翎

欽此該員人品謹飭辦事詳慎保升在出缺之前以
之請補施南府同知實堪勝任惟候補同知尙有奉
旨在先之員因人地均不相宜應請以該員擬

補又例載州縣應調缺出無合例之員以候補正途人員題補候補一班無論何項出身凡係應歸候補者俱爲正途等語茲有監利縣繁疲難應調要缺原補王震保升開缺咸豐八年七月初五日奉準行知該縣地闊賦繁錢漕積弊甲於他邑現擬查辦清丈兼有隄工重務於兼三要缺中尤爲難治之區非精明幹練之員不能治理通省實缺中並無可調之員查有候補知縣補用同知直隸州牟嗣龍現年四十三歲江蘇武進縣人出捐輸部選湖北東湖縣南沱巡檢咸豐二年五月初十日到任辦理宜昌鹽課團

練五年五月十九日奉

上諭開缺以府經歷用

六年於籌辦軍需案內奉

上諭免補本班以知

縣仍留湖北補用復因辦理荆宜鹽課接濟軍餉出力七年正月初八日奉

上諭免補本班以同知

直隸州儘先補用各等因欽此部議應補知縣後以同知直隸州補用該員守潔才優實心任事辦理鹽課任怨任勞始終不懈且曾選授實缺到省已歷多年地方利弊尤爲熟悉以之請補監利縣缺洵堪勝任惟候補尙有奉

旨在先之員因人地均不相

宜應請以該員擬補又例載病故缺出以一缺題補

各項候補並卽用之員以一缺題補本班前先用大挑舉人以一缺題補本班大挑舉人等語茲有松滋縣一缺原任劉鴻庚殉難歸咸豐四年截缺是年卽用大挑各員均未到班現在雖有合例之員人地均不相宜查有軍功班同知銜畱楚遇缺卽補知縣汪維城現年五十八歲安徽宿松縣人道光辛卯

恩科舉人甲辰科大挑二等選授青陽縣訓導辦理團練調入軍營隨同剿賊咸豐八年克復黃安麻城案內奉 上諭以知縣畱於湖北遇缺卽補賞加同知銜欽此該員守正才明通達政體以之補松滋

縣缺洵堪勝任惟並非大挑人員且出缺在前到省
在後與例未符又通城縣一缺本任袁奉仁八年二
月初九日病故據藩臬兩司詳請叩留外補業經題
明在案該縣與湖南江西接壤爲南路最要門戶昔
年賊匪盤踞義甯州必取道通城邊防險要尤須得
人茲查有候補知縣吳林現年五十歲江蘇嘉定縣
人由道光庚子 恩科舉人甲辰科會試後挑取
騰錄二十年傳送 國史館咸豐二年議敘以知縣
川三年回籍青浦縣匪徒滋事挈獲首逆案內奉
旨賞加同知銜花翎八年 奏留湖北軍營克復

九江案內六月十九日奉

旨吳林著留於湖北

遇缺卽補欽此該員樸實廉幹現署應山縣卓著循聲以之請補通城縣缺洵堪勝任惟候補班補病故遺缺與例未符又例載升調所遺缺出以一缺題補各項候補並進士卽用人員以一缺題補各項委用人員茲有黃安縣一缺本任許賡藻保升知府咸豐七年十二月十六日奉

旨開缺爲此次開補升

調遺第一缺查有同知銜候補知縣諸鑑現年四十六歲浙江錢塘縣人由監生報捐從九品分發湖北道光十七年四月到省二十三年咨補鍾祥縣豐樂

河巡檢咸豐四年安陸府軍功案內奉

上諭開

缺以縣丞儘先補用五年克復德安府城案內奉

上諭免補本班以知縣補用六年於克復武昌漢

陽案內

賞加同知銜花翎該員才具明幹勤奮

有爲以之請補黃安縣缺實堪勝任又京山縣一缺

本任裘紹箕調補襄陽縣咸豐八年十一月二十七

日奏準部文開缺爲升調遺第二缺該縣缺雖中簡

而俗傲民刁素稱難治兼之地方被擾民氣凋殘尤

須撫馭得宜方臻妥善查有候補知縣程光第現年

三十八歲河南光山縣人由捐納縣丞分發湖北咸

豐六年六月十一日到省七年襄陽軍需案內奉

上諭免補本班以知縣畱於湖北補用該員勤苦自勵爲守兼優現署長陽縣事甚洽輿情以之請補京山縣缺實堪勝任惟非委用人員與例不符又例載部選知縣缺內有丁憂所出之缺軍務出力奉

旨儘先補用人員準該督撫叩畱題補茲有鄖西縣一缺本任葛致遠咸豐八年十二月初五日丁憂出缺例用軍功人員查有候補知縣文南邦現年四十八歲湖南益陽縣人道光甲辰科舉人揀選知縣咸豐四年調入軍營七年克復武昌案內奉 上

諭留於湖北儘先補用該員樸實安穩潔已愛民前
署穀城縣事卓有循聲以之請補鄖西縣缺實堪勝
任據藩司羅遵殿臬司莊受祺會詳前來臣等詳加
覆覈員缺實屬相當伏查軍務省分有警則防勦需
才無事亦撫綏孔亟鄂居天下之中道途四達接壤
鄰氛值此多事之秋守土之官尤宜慎加遴選現在
請補各員才具操守皆臣等所深信且均係軍功保
升於地方實有裨益仍將與例不符各緣由據實聲
明合無仰懇 天恩飭部核覆準將施南府副知
一缺以候補同知趙篤慶監利縣缺以候補知縣補

用同知直隸州牟嗣龍松滋縣缺以同知銜留楚遇
缺卽補知縣汪維城通城縣缺以花翎同知銜留於
湖北遇缺卽補知縣吳林黃安縣缺以同知銜候補
知縣諸鑣京山縣缺以候補知縣程光第鄖西縣缺
以候補知縣文南邦請補如蒙 俞允各該員應
行送部引 見俟軍務完竣照例給咨 臣等爲用
人起見謹合詞恭摺具 奏

硃批吏部議奏欽此

指員請補廣濟縣疏 三月十九日

竊查湖北廣濟縣缺雖中間接壤安徽水陸交錯煩

年逆氛不靖屢被賊擾籌勦籌防非精明幹練之員不能治理實楚北邊圉最要之缺咸豐三年部選廣濟縣知縣陳兆麟選缺已越五年延不到省例應開缺臣等前以地方緊要由司飭委軍功畱楚知縣方大湜前往署理其時賊氛緊逼地方屢經蹂躪民力更復凋殘該員到任後辦理團練保甲撫綏整飭四境枚安民心愛戴且查廣濟歷年錢漕疲玩道光年間徵收日減咸豐三年該縣復經抗糧聚眾戕官踞城釀成巨患皆由州縣之委用非人而吏胥之因緣舞弊故亂民得以倡率起事也該員履任之後以迭

次殘破之區應徵錢漕依限完解比較各屬倍形踴躍催科尤屬得力查方大湜現年三十七歲湖南巴陵縣附生咸豐四年調入軍營於攻勦武昌府城出力案內咸豐五年五月十二日奉 上諭附生方

大湜著以訓導不論雙單月儘先選用欽此又於克復武昌省城案內七年三月初六日奉 上諭選

用訓導方大湜著免選本班以知縣畱於湖北儘先補用欽此現在太湖潛山霍山鄰氛逼近該員署任以來於防堵機宜辦理已有成效所有廣濟縣一缺擬請破格以方大湜補用據藩臬兩司具詳前來臣

等伏查原選之廣濟縣知縣陳兆麟選缺已越五年之久延未到省其畏避賊氛已可概見邊防緊要未使再事虛懸現在署任之候補知縣方大湜團練保甲深得民心當此皖氛正熾防堵需人未便更易生手惟廣濟係選缺方大湜軍功保留尙未送部與例不符仰懇 天恩逾格俯念員缺久懸邊防緊要

準將原選之廣濟縣知縣陳兆麟

飭部開缺所

遺廣濟縣缺可否卽以軍功畱楚知縣方大湜補授

實於地方有神如蒙

飭部逾格議準俟軍務告

竣照例給咨赴部引

見除將履歷咨部外是否

有當謹合詞恭摺具奏

上諭官文等奏請將延不到任之知縣開缺並酌量擬補一摺湖北廣濟縣知縣陳兆麟選缺已逾五年延不到任著卽開缺所遺廣濟縣知縣員缺準其以現在署任之儘先補用知縣方大湜補授以資熟手俟軍務告竣再行送部引見欽此

胡文忠公遺集卷三十二終